

43 pelajar sertai Kem Transformasi Diri untuk pemimpin pelajar

Oleh: WAN NAZRUL HELMY WAN MOHD. ZAIN

Seramai 43 pemimpin pelajar Universiti Malaysia Pahang (UMP) telah mengikuti Kem Transformasi Diri Ke Arah UMP Terbilang di Institut Pengurusan Peladang (IPP) Rompin pada 21 hingga 23 Mei 2009 yang lalu.

Kesemua para pemimpin pelajar tersebut, yang terdiri daripada Yang di-Pertua dan ahli-ahli Majlis Perwakilan Pelajar (MPP) dan Pengurus Badan-Badan Pelajar yang lain dibimbing oleh perunding motivasi terkemuka, Dato' Dr. Mohd. Fadzilah Kamsah untuk menjalani pelbagai modul menarik berkaitan Transformasi Diri.

Kem Transformasi Diri Ke Arah UMP Terbilang: Sasaran Kumpulan Pemimpin Pelajar itu adalah kesinambungan daripada pelaksanaan program terdahulu pada awal bulan Mei 2009 di Taman Negara yang melibatkan pegawai-pegawai Kumpulan Pengurusan Kanan UMP.

Pelaksanaan modul sepanjang kem tiga hari itu turut dijayaikan oleh beberapa perunding motivasi daripada Excel, Ebit Irawan Ibrahim Liew dan Siti Rohani serta penganalisis jenayah terkemuka, Kamal Affandy Hashim.

Majlis perasmian telah disempurnakan oleh Naib Canselor UMP, Yang Hormat Profesor Dato' Dr. Daing Nasir Ibrahim.

Dalam ucaptama beliau yang bertajuk "Wawasan Saya Terhadap Kepimpinan Pelajar UMP", Dato' Dr. Daing Nasir menegaskan bahawa pelaksanaan kem ini haruslah dilihat sebagai pelaburan jangka panjang bagi melahirkan generasi pemimpin pelapis negara yang akan memaknakan slogan '1Malaysia' dalam erti kata yang sebenarnya.

Beliau juga menolak tanggapan negatif yang mengatakan pelaksanaan kem ini untuk pemimpin pelajar sedia ada sebagai tidak perlu.

"Impak daripada pelaksanaan kem ini bukanlah terbatas kepada penggal jawatan anda sebagai pemimpin pelajar, namun apa yang diharatkannya ialah kesan jangka panjang di mana anda akan menjadi anak Malaysia yang bersedia mengupayakan transformasi negara dan alumni yang berjasa kepada UMP, hasil daripada penyertaan dalam kem ini," ujarnya.

Malah beliau turut berkesempatan untuk berdialog dengan para pemimpin pelajar selepas ucaptama perasmian tersebut.

Yang di-Pertua MPP, Mohd. Suffi Kamari pula menyifatkan bahawa pelaksanaan kem ini sebagai amat tepat pada masanya.

"Saya percaya bahawa pelaburan pihak universiti untuk mengadakan kem ini adalah satu pelaburan yang menguntungkan."

"Transformasi yang bermula dari dalam diri akan memangkinkan pula transformasi perdana negara melalui kesedaran warganegara, khususnya generasi muda," katanya.

Pengerusi Jawatankuasa Pelajar Kolej Kediaman 3, Noor Shahirah Shamsul ketika ditemui pula menyatakan rasa syukur yang tidak terhingga kerana berpeluang untuk berkongsi ilmu dan pengalaman daripada tokoh terkemuka seperti Dato' Dr. Fadzilah Kamsah dan Kamal Affandy Hashim.

"Interaksi langsung dengan tokoh-tokoh terkemuka memberi peluang kepada para pemimpin pelajar untuk melihat dunia daripada pelbagai sudut pandang."

"Saya amat gembira dapat mengikuti kem ini dan sewajarnya pelaksanaannya diteruskan untuk generasi pemimpin pelajar akan datang," ujarnya.

Bagi Presiden Persatuan Pelajar Fakulti Kejuruteraan

Mekanikal (MECHAPRO), Hilmi Mohd. Zahidi pula, pengisian yang diperoleh daripada modul-modul yang dijalankan akan dimanfaatkan seoptimum mungkin bagi melonjakkan prestasi MECHAPRO melalui Pelan Strategik & Transformasi yang sedang dirangka.

Pendapat tersebut turut dikongsi oleh Presiden Persatuan Pelajar Fakulti Kejuruteraan Kimia & Sumber Asli (CHEST), Irwan Syah Md. Zain yang mengharapkan komitmen berterusan pihak UMP untuk menggilap potensi kepemimpinan pelajar melalui program seumpama ini.

"Transformasi yang bermula dari dalam diri akan memangkinkan pula transformasi perdana negara melalui kesedaran warganegara, khususnya generasi muda."